

CONVENIO DE COLABORACIÓN EN MATERIA DE FORMACIÓN ENTRE A ACADEMIA GALEGA DE SEGURIDADE PÚBLICA E O CONCELLO DE VIGO

COMPARECEN:

DUNHA PARTE, D. Santiago Villanueva Álvarez, director xeral da Academia Galega de Seguridade Pública (AGASP), actuando no seu nome e representación en virtude das competencias que ten atribuídas polo artigo 12 da Lei 1/2007, do 15 de xaneiro, da Academia Galega de Seguridade Pública.

DOUTRA, D^a Patricia Rodríguez Calviño, concelleira da Área de Goberno de Seguridade, Contratación, Festas e Xestión Municipal do Concello de Vigo, actuando en virtude das atribucións que lle confire o artigo 124 da Lei 7/1985, do 2 de abril, reguladora das bases de réxime local, por delegación de alcaldía.

Ambas partes interveñen na representación e coas facultades que os seus respectivos cargos lle confiren, recoñecéndose reciprocamente capacidade e lexitimación bastante en Dereito para outorgar e firmar o presente Convenio de colaboración, e a tal efecto:

EXPOÑEN:

I.- Que conforme á Lei 1/2007, do 15 de xaneiro, da Academia Galega de Seguridade Pública (AGASP) -artigos 1, 4.2 e 5.2-, este centro é un organismo autónomo de carácter administrativo, adscrito organicamente á consellería competente en materia de interior e xustiza e ten encomendada, entre outras funcións, a de: "elaborar os programas formativos e impartir os cursos dirixidos ao ingreso e á promoción interna nas distintas escalas dos Corpos da Policía de Galicia e das Policía Local, así como a súa formación continua, perfeccionamento e especialización"; e a de "promover relacións de intercambio e colaboración coas universidades e institucións de Galicia, así como con outros centros docentes e investigadores de ámbito autonómico, estatal ou internacional".

II.- Que conforme aos artigos 137 e 140 da Constitución Española, e artigos 11 e seguintes da Lei 7/1985, do 2 de abril, reguladora das bases de réxime local, os Concellos son entidades locais territoriais, con personalidade xurídica propia e plena capacidade para o cumprimento dos seus fins.



Que o Concello de VIGO dispón de Corpo de Policía Local que realiza un labor docente complementaria da exercida pola AGASP.

Que o artigo 57 da devandita Lei 7/1985 contempla o convenio como un dos instrumentos de cooperación económica, técnica e administrativa entre os entes locais e calquera das restantes administracións territoriais.

III.-Que en aras do principio de eficacia e eficiencia que deben presidir as actuacións administrativas, ambas as partes consideran necesario cooperar no exercicio da función de formación continua e perfeccionamento dos membros da Policía Local, pois brinda a oportunidade de multiplicar os logros de cada institución reducindo os custos.

Que convencidos do interese público e común desa cooperación, acordan formalizar o presente convenio de colaboración que se rexerá polas seguintes:

CLÁUSULAS:

PRIMEIRA: Obxecto do convenio.

O obxecto do presente convenio é acadar a colaboración entre a AGASP e o Concello de VIGO, para a formación continua do persoal da seguridade pública e das emerxencias.

Esta formación levarase a cabo mediante cursos e demais accións formativas sobre temas que sexan de interese profesional e que supoñan unha mellora da súa cualificación e eficacia no servizo, a través do mantemento ou potenciación da súa capacitación, así como mediante a participación en actividades de difusión das funcións, medios e procedementos.

SEGUNDA: Organización das actividades formativas.

A organización dos cursos, xornadas e das accións formativas en xeral, deberá axustarse ás pautas seguintes:

1. O deseño, estrutura, obxectivos e as datas de cada curso serán consensuados e aprobados por ambas as dúas partes, podendo ser propostos por calquera delas indistintamente.
2. As solicitudes de participación que remita o alumnado dirixiranse ao Concello de VIGO que será o último responsable da selección de admitidos ás actividades formativas.
3. Os criterios de selección serán os que estableza o Concello de VIGO, respectando sempre os principios de idoneidade, capacidade e non discriminación para cada convocatoria e aplicando



as normas xerais en relación á conciliación familiar e igualdade.

4. Feita a selección, confeccionarase unha listaxe de admitidos/as á que se lle dará a publicidade habitual para que cada solicitante saiba que está admitido/a e poida comunicar a imposibilidade de asistencia ao curso, se así fose.
5. Rematada cada acción formativa, o Concello de VIGO remitirá a AGASP a certificación coa listaxe do alumnado que superou a mesma, para que esta entidade a través da súa aplicación de xestión, lle faga constar a cada alumno/a a realización e superación de dita acción formativa.

TERCEIRA: Profesorado, aulas e locais.

De forma conxunta decidiranse a selección e contratación dos profesores.

As clases impartiranse nas instalacións do concello de VIGO, que presenten idoneidade, capacidade e medios técnicos bastantes, ou noutras instalacións que decidan ambas partes.

CUARTA: Seguimento, coordinación e control das actividades formativas.

1. A Xefatura da Policía Local do concello de VIGO, ou persoa responsable en quen delegue, asume o control das accións formativas, especialmente da asistencia do alumnado ás clases, o funcionamento e emprego de medios técnicos e da atención aos/as docentes.
2. Os diplomas que se expidan ao remate de cada curso ou xornada estarán asinados pola persoa que ocupa a Alcaldía do Concello de VIGO ou concelleiro/a-delegado-a que corresponda ou en quen delegue, e pola persoa que ocupa a Dirección Xeral da AGASP ou en quen delegue, e neles figurarán ambas as dúas institucións.
3. As certificacións que poidan requirir o persoal docente ou o alumnado sobre a súa participación ou asistencia nas actividades formativas, poderán ser expedidas por calquera das partes, facendo constar a organización conxunta.

QUINTA: Financiamento e xestión económica das actividades formativas.

1. O financiamento das actividades formativas desenvolvidas ao abeiro do convenio será sufragadas polo concello de VIGO.
2. A sinatura deste convenio non implica por parte da AGASP, compromiso de gasto con cargo ás aplicacións orzamentarias do estado de gastos dos orzamentos xerais da Comunidade Autónoma de Galicia.



SEXTA: Requisitos para a obtención do diploma e réxime disciplinario.

Estes aspectos estarán regulados pola normativa aplicable na AGASP para cada tipo de acción formativa, que se especificará no texto de cada convocatoria.

SÉTIMA: Comisión de seguimento.

Para o desenvolvemento e seguimento deste convenio créase unha Comisión Mixta paritaria, composta por dúas persoas designadas por cada parte, que adoptará os acordos por unanimidade.

Son funcións desta comisión de seguimento as atribuídas no artigo 49 f) respecto do art. 48.1 da Lei 40/2015, do 1 de outubro, de réxime xurídico do sector público.

OITAVA: Vixencia do convenio.

O presente convenio ten vixencia dende a data da súa sinatura ata un máximo de catro anos de duración prorrogándose de xeito automático por anualidades naturais, salvo denuncia de calquera das partes antes da súa finalización, ou da finalización de cada unha das prórrogas.

NOVENA: Causas de resolución.

De conformidade co establecido no artigo 51.2 da Lei 40/2015, mencionada con anterioridade, son causas de resolución do Convenio:

- A renuncia de calquera das partes, formulada por escrito cun mes de antelación á data na que desexa a finalización do mesmo.
- O incumprimento das cláusulas do mesmo.
- O mutuo acordo das partes.

DÉCIMA: Modificacións.

As modificacións formalizaranse mediante Addenda, cos mesmos requisitos e condicións que para a aprobación do convenio se esixen.

UNDÉCIMA: Publicidade.

En cumprimento do disposto na Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o Rexistro de Convenios da Xunta de Galicia, a Consellería de Presidencia, Xustiza e Deportes remitirá os datos necesarios para a publicidade do convenio e informará na páxina web oficial da dita subscripción cos seguintes



datos básicos: identificación das partes que interveñen, importe do financiamento, data da sinatura, finalidade e período de vixencia. A sinatura do convenio implica a autorización expresa para o tratamento necesario dos datos e a referida publicidade. As partes asinantes do convenio manifestan o seu consentimento para que os datos persoais que constan neste convenio, así como o resto das especificacións que contén, poidan ser publicados no Portal da Transparencia e Goberno Aberto.

DUODÉCIMA: Natureza e Réxime xurídico.

1. Este convenio ten natureza administrativa e rexerase polo establecido na Lei 40/2015, do 1 de outubro, quedando excluído do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, en virtude do establecido no artigo 6.1 da citada Lei de contratos do sector público.
2. As discrepancias que xurdan pola aplicación deste convenio serán resoltas pola comisión de seguimento prevista na cláusula sétima. De persistir as mesmas resolverá a persoa titular da consellería competente en materia de seguridade e a Xunta de Goberno local do concello, no ámbito das respectivas competencias, poñendo fin á vía administrativa.
3. Este convenio obriga ao cumprimento do expresamente pactado, someténdose ambas as dúas partes ao acordado en todas as estipulacións, e como proba de conformidade asíñase no lugar arriba indicado.

POLA ACADEMIA GALEGA
DE SEGURIDADE PÚBLICA

POLO CONCELLO DE VIGO

Santiago Villanueva Álvarez

Patricia Rodríguez Calviño

